



ALERTA

ULTIMATUM GOVERNU BA MEMBRUS 'GRUPU ILEGÁL'

3 Abril 2014

Ultimatum husi Sekretáriu Estadu ba Seguransa kona-ba Movimentu 'grupu ilegál'

Iha dia 1 Abril 2014, Sekretáriu Estadu ba Seguransa fó ultimatum ba 'grupu ilegál' katak, hahú iha dia 1-3 Abril 2014 membru 'grupu ilegál' sira ne'ebé seidak entrega an inklui oknum balun ne'ebé tuir reportajem husi fontes balun ne'ebé Belun verifika katak, kaer kilat iha foho Matebian tenki entrega an no entrega mos armas sira seluk, se lae husi dia 3 Abril 2014 PNTL ho F-FDTL sei halo operasaun konjunta ida hodi kaer membru 'grupu ilegál' sira.

Iha dia 3 Abril 2014, versaun Suara Timor Loro-sa'e reporta katak, Komandante Jerál PNTL, Komisáriu Sr. Longuinhos Monteiro hanaruk tan ultimatum ba semana ida. Esteitmentu Komandante Jeral PNTL nian ne'e bazeia ba rezolusaun Governu nian numeru 8/2014 ne'ebé fó instrusaun ba PNTL – F-FDTL hodi halo operasaun ida ba grupu ilegál sira.

PNTL halo atividade tama-sai uma iha suku Sagadate, Salari, Samalari, Atelari, Nunira, Libagua iha subdistritu Laga no suku Lavateri subdistritu Baguia hahú segunda dia 31-03-2014 to'o agora hodi halo sosializasaun rezolusaun Governu no buka informasaun relasaun ho atividade 'grupu ilegal' sira bele koopera ho instituisaun seguransa ba kria estabilidade rai laran.

Majór Jenerál Lere Anan Timor fo sai husi media (Suara Timor Loro-sa'e, 27-03-2014) katak, membrus balun husi 'grupu ilegál' hanesan Konsellu Revolusaun Maubere (KRM) no CPD-RDTL ne'ebé halai sa'e ba ailaran iha armas no nia husu atu 'grupu ilegál' sira ne'e koopera ho PNTL hodi bele entrega kilat. Excia Sr. Prezidente da República no excia Sr. Primeiru Ministru mos ezije liuhusi média atu 'grupu ilegál' sira ne'e tenki entrega armas. Maske nune'e excia Sr. Prezidente hateten ba media katak nia lakohi operasaun konjunta PNTL no F-FDTL halo violénsia (Diariu, dia 27-3-14).

Monitorizasaun Belun nian liuhusi programa Atensaun no Responde Sedu (AtRes) , iha dia 10 Marsu 2014, bainhira PNTL halo atuasaun ho forsa ba membru ‘grupu ilegál’ CPD-RDTL no KRM ninia akontonamentu iha Aldeia Lalulai, Suku Sagadate, Subdistritu Laga, distritu Baucau akontese konfrontu entre membru grupu KRM ho PNTL. Impaktu husi konfrontu ne’e mak membru PNTL ida hetan kanek no membru balun husi grupu KRM halai ba ai laran.

Atuasaun PNTL ba grupu ilegais iha Distritu sira

Tuir Rezolusaun Parlamentu Nasionál No.5/2014 kona-ba ‘grupu ilegál’ sira, ne’ebé fo sai iha dia 5 Marsu 2014, Polísia Nasionál Timor-Leste (PNTL) halo ona atuasaun ba grupu Konsellu Popular Demokrátiku – Repúblika Demokrátiku de Timor-Leste (CPD-RDTL) no grupu Konsellu Revolusaun Maubere (KRM) iha distritu 13. Durante tempu ne’e to’o agora PNTL halo sosializasaun kona-ba konteúdu rezolusaun número 5/2014 no mós halo atuasaun ba sede grupu CPD-RDTL hodi losu ai-riin bandeira, hatu’un bandeira, rekolla farda, rekolla dokumentus CPD-RDTL no rekolla mós kartaun membru CPD-RDTL sira nian iha distritu 13. Maioria membrus grupu ilegál sira, koopera di’ak hodi entrega atributus no dokumentus, nomós presta deklarasaun nu’udar sidadaun babain.

Tuir monitorizasaun Belun nian, durante atuasaun ne’e maioria membrus grupu CPD-RDTL no KRM entrega an no atributus nomos koopera di’ak ho PNTL iha distritus 13 iha Timor-Leste. Bainhira PNTL halo atuasaun ba grupu Falintil Baze de Apoiu (FBA) iha distritu Baucau, PNTL sira konsege rekolla kilat rakitan, marotok, rama no diman. Iha distritu Aileu PNTL mós rekolla rama no mós kilat manu ne’ebé modifika ba rama. Iha Aileu PNTL mós kaer membru ‘grupu ilegál’ nain 5 maibé ida halai liu.

Prosesu Justisa ba Lider ‘Grupu Ilegais’

Iha dia 13 Marsu 2014 iha Fatuhada, Dili, Sr. Paulino Gama alias Mauk Moruk hanesan Prezidente Konsellu Revolusaun Maubere entrega-an ba PNTL. PNTL ka’er Sr. Komandante Labarik hanesan Komandante grupu Bua Malus ne’ebé sefia mós grupu Falintil Baze de Apoiu (FBA), hodi submete ba prosesu justisa. Iha dia 14 Marsu 2014, responsável ba grupu CPD-RDTL, Sr. António Aitahan Matak entrega an ba Polísia.

Iha dia 14 no 15 Marsu Tribunál Distritál Dili halo primeiru-interigatoriu ba lider grupu sira, no aplika medidas koasaun hanesan prizaun preventiva (hetan detidu) durante fulan 6 ba Sr. Mauk Moruk ho Komandante Labarik. Sr. António Aitahan Matak, Sr. L-7 no membru 12 seluk husi grupu CPD-RDTL hetan medidas koasaun nu’udar “kausaun” (atu hanesan multa) ho termus presiza apresenta an ho regular, la bele sai ba rai liur, no la bele halibur ema hodi enkontru, durante semana rua nia laran.

REKOMENDASAUN:

Sua Ex.cia Prezidente Repúblika:

- Haforsa mensajen dame ba povu kona-ba observasaun ba situasaun atuál seguransa ohin lora;
- Apela ba membrus 'grupu ilegál' sira ne'ebé mak halai no kaer kilat no lori armas seluk atu kolabora ho PNTL ne'ebé agora halo hela atuasaun ba situasaun ne'e.

Sekretáriu Estadu Seguransa husi Instituisaun PNTL no F-FDTL

- Kontinua aprosima ba membrus grupu ilegais sira no lideransa lokál hotu hodi halo atuasaun pasífiku nafatin no eleva as nafatin prinsípius direitus umanus.

Autoriedade Lokál ho lider tradisionais

- Kopera ho autoridades seguransa hodi halo diálogu no aprosimasaun pasífiku nafatin ho eis-membru grupu ilegais sira hodi sira bele hela no moris hakmatek iha comunidade nia leet.

Media

- Dezimina informasaun atuál to'o area urbanu no remota hodi comunidade asesu informasaun lo'los no akurat hodi prevene ba rumoris ne'ebé bele lori comunidade sente la-hakmatek.
- Uza linguajen ne'ebé la hamosu/provoka tensaun entre eis grupu ilegais ho estadu.

Informasaun liután ho perguntas no klarifikasaun, favor bele kontaktu

- Sra. Marilia Oliveira da Costa, bylah.belun@gmail.com (7727 6671)
- Sr. Pedro de Araujo, pedroa.belun@gmail.com (7700 1421)
- Ms. Sarah Dewhurst, sarah.belun@gmail.com (7742 8371)



Publikasaun ne'e hetan apoiu husi Povu Amerikanu liuhusi USAID no mós Uniaun Europea liuhusi projetu Instrumentu ba estabilidade. Alerta ne'e la reprezenta opiniaun husi USAID, Povu ka Governu Amerikanu ka Uniaun Europea.